



REPUBLIKA E SHQIPËRISË
BASHKIA HIMARË
DREJTORIA JURIDIKE

Nr. 8012 prot.

Himarë, më 27.10. 2025

Lënda: Dërgohet për miratim projekt vendimi “Për Miratimin e Rregullores të Komisionit Këshillimor “Për Titujt Vendorë të Nderit, kriteret dhe procedurën e dhënies së tyre si dhe emërtimin e rrugëve, shesheve, territoreve, institucioneve dhe objekteve në juridiksionin e Bashkisë Himarë”.

KESHILLIT BASHKIAK HIMARË,

Himarë

Bazuar në nenin 8, nenin 9.1, pika 1.1/a dhe b, pika 1.7/a dhe b, nenin 54 pika a, k, l dhe m të ligjit nr.139/2015 “Për vetëqeverisjen vendore”, (i përditësuar), në ligjin nr.112/2013 “Për Dekoratat, Titujt e Nderit, Medaljet dhe Titujt Vendorë të Nderit në Republikën e Shqipërisë”, neni 17 e në vijim, në Ligjin nr. 94/2022 datë 22.12.2022 “Për Titujt e Nderit dhe Titujt Vendorë të Nderit në Republikën e Shqipërisë”, në VKM-në nr. 861 datë 10.02.2014 “Për miratimin e rregullave të hollësishme për funksionimin e Komisioneve Këshillimore për dhënien e Medaljeve dhe Titujt Vendorë të Nderit në Republikën e Shqipërisë” si dhe në relacionin e paraqitur nga Drejtoria Juridike, me propozim të Kryetarit të Bashkisë Himarë; me propozim të Kryetarit të Bashkisë Himarë:

Bashkëlidhur ju dërgojmë:

- Projekt vendimin “Për Miratimin e Rregullores të Komisionit Këshillimor “Për Titujt Vendorë të Nderit, kriteret dhe procedurën e dhënies së tyre si dhe emërtimin e rrugëve, shesheve, territoreve, institucioneve dhe objekteve në juridiksionin e Bashkisë Himarë”.

- Relacion: Mbi projekt vendimin “Për Miratimin e Rregullores të Komisionit Këshillimor “Për Titujt Vendorë të Nderit, kriteret dhe procedurën e dhënies së tyre si dhe emërtimin e rrugëve, shesheve, territoreve, institucioneve dhe objekteve në juridiksionin e Bashkisë Himarë.
- Rregullore e Komisionit Këshillimor të Bashkisë Himarë “Për Titujt Vendorë të Nderit, kriteret dhe procedurën e dhënies së tyre si dhe emërtimin e rrugëve, shesheve, territoreve, institucioneve dhe objekteve në juridiksionin e Bashkisë Himarë”.

KRYETARI

Vangjel Tavo

**NË MUNGESË DHE ME URDHËR
ZËVENDËSKRYETARI**

Erifili Berberi





REPUBLIKA E SHQIPËRISË
BASHKIA HIMARË
DREJTORIA JURIDIKE

Nr. 8012/prot.

Himarë, më 27.10.2025

PROJEKT-VENDIM
Nr. 53, Datë 27.10.2025

PËR

**“MIRATIMIN E RREGULLORES TË KOMISIONIT KËSHILLIMOR PËR
TITUJT VENDORË TË NDERIT, KRITERET DHE PROCEDURËN E DHËNIES
SË TYRE SI DHE EMËRTIMIN E RRUGËVE, SHESHEVE, TERRITOREVE,
INSTITUCIONEVE DHE OBJEKTEVE NË JURIDIKSIONIN E BASHKISË
HIMARË”**

Bazuar në nenin 8, nenin 9.1, pika 1.1/a dhe b, pika 1.7/a dhe b, nenin 54 pika a, k, l dhe m të ligjit nr.139/2015 “Për vetëqeverisjen vendore”, (i përditësuar), në ligjin nr.112/2013 “Për Dekoratat, Titujt e Nderit, Medaljet dhe Titujt Vendorë të Nderit në Republikën e Shqipërisë”, neni 17 e në vijim, në Ligjin nr. 94/2022 datë 22.12.2022 “Për Titujt e Nderit dhe Titujt Vendorë të Nderit në Republikën e Shqipërisë”, në VKM-në nr. 861 datë 10.02.2014 “Për miratimin e rregullave të hollësishme për funksionimin e Komisioneve Këshillimore për dhënien e Medaljeve dhe Titujt Vendorë të Nderit në Republikën e Shqipërisë” si dhe në relacionin e paraqitur nga Drejtoria Juridike, me propozim të Kryetarit të Bashkisë Himarë;

VENDOSI:

1. Të miratojë Rregulloren “Për Titujt Vendorë të Nderit, Kriteret dhe Procedurën e Dhënies së Tyre si dhe Emërtimin e Rrugëve, Shesheve, Territoreve, Institucioneve dhe Objekteve në Juridiksionin e Bashkisë Himarë”, sipas tekstit bashkëlidhur këtij vendimi.
2. Për zbatimin e këtij vendimi ngarkohet Kryetari dhe Administrata e Bashkisë Himarë, Kryetari dhe Sekretariati i Këshillit të Bashkisë si dhe Komisioni Këshillimor për Titujt Vendorë të Nderit të Këshillit të Bashkisë Himarë.
3. Ky vendim hyn në fuqi bazuar në Ligjin nr. 139/2015 datë 17.12.2015 “Për vetëqeverisjen vendore”, neni 55 pika 6.

KRYETARI
Vangjel Tavo

**NË MUNGESË DHE ME URDHËR
ZËVENDËSKRYETARI**

Erifili Berberi





REPUBLIKA E SHQIPËRISË
BASHKIA HIMARË
DREJTORIA JURIDIKE

Nr. 8012/prot.
2

Himarë, më 27.10. 2025

RELACION:

**MBI PROJEKT VENDIMIN “PËR MIRATIMIN E RREGULLORES TË KOMISIONIT
KËSHILLIMOR PËR
TITUJT VENDORË TË NDERIT, KRITERET DHE PROCEDURËN E DHËNIES
SË TYRE SI DHE EMËRTIMIN E RRUGËVE, SHESHEVE, TERRITOREVE,
INSTITUCIONEVE DHE OBJEKTEVE NË JURIDIKSIONIN E BASHKISË HIMARË”**

Të nderuar Këshilltarë!

Projektvendimi që ju paraqesim për miratim “Për Miratimin e Rregullores të Komisionit Këshillimor “Për Titujt Vendorë të Nderit, kriteret dhe procedurën e dhënies së tyre si dhe emërtimin e rrugëve, shesheve, territoreve, institucioneve dhe objekteve në juridiksionin e Bashkisë Himarë”, lidhet me procedurat dhe vendimmarrjen e Komisionit Këshillimor për Titujt Vendorë të Nderit të Këshillit të Bashkisë.

Sikurse jeni në dijeni Komisioni Këshillimor është krijuar rishatzi dhe aktualisht nuk ka një rregullore të miratuar e cila është e domosdoshme për vendimmarrjen e tij por, edhe të Këshillit të Bashkisë.

Me këtë rregullore është synuar të krijohen disa standarte në vendimmarrjen e Këshillit të Bashkisë gjatë vlerësimit të personaliteteve të shquara me kontribut në nivel lokal dhe kombëtar. Gjithashtu në këtë rregullore synohet që edhe për emërtimin e rrugëve, shesheve, institucioneve ose objekteve në juridiksionin e Bashkisë Himarë të ndiqet e njëjta procedurë si për dhënien e Titujve Vendorë të Nderit. Kjo nënkupton që rregullorja nuk kufizohet vetëm në procedurën e dhënies së Titujve Vendorë të Nderit sikurse parashikohet në dispozitat ligjore për ngritjen e Komisionit Këshillimor. Pra, objektivi është që edhe gjatë emërtimit të rrugëve, shesheve,

institucioneve etj, para vendimmarrjes së Këshillit të Bashkisë të bëhet një vlerësim paraprak nga Komisioni Këshillimor, pavarësisht se kjo nuk e kufizon vendimmarrjen e Këshillit të Bashkisë.

Në këtë rregullore njëkohësisht është formalizuar edhe dhënia e vlerësimeve për personalitetet e shquara të qytetit nga Kryetari i Bashkisë, në rastet kur vlerësohet se nuk plotësohen kushtet për ti dhënë Titullin Qytetar Nderi i Himarës.

E rëndësishme në këtë rregullore është edhe përcaktimi i procedurave për përcaktimin e subjekteve të cilët mund të bëjnë propozime për vlerësim, përcaktim i cili nga një aspekt thjeshton procedurën për vendimmarrje por qartëson gjithashtu faktin se propozimi për një titull a medalje nuk është një e drejtë që kërkohet në mënyrë individuale ose nga familjarët, gjë që është e konstatuar nga kërkesat e paraqitura në këtë periudhë pranë Sekretariatit të Këshillit të Bashkisë.

Një aspekt thelbësor i kësaj rregulloreje është edhe përcaktimi i kritereve etike dhe morale për personat që mund të vlerësohen me tituj vendorë të nderit. Në këtë kuadër, është parashikuar qartë përjashtimi i çdo personi që ka qenë bashkëpunëtor i ish-Sigurimit të Shtetit, si dhe i ish-anëtarëve të komisioneve të internimit, të cilët kanë kontribuar në përndjekjen politike, shtypjen apo diskriminimin e qytetarëve gjatë periudhës së regjimit totalitar si dhe personave të cilët janë dënuar sipas nenit 268 të “Kodit Penal të Republikës së Shqipërisë” (Poshtërimi i Republikës dhe i simboleve të saj).

Ky përcaktim përbën një garanci për respektimin e vlerave demokratike dhe dinjitetit qytetar, duke siguruar që titujt vendorë të nderit t’u jepen vetëm atyre që përfaqësojnë me integritet moral dhe shoqëror komunitetin e Bashkisë Himarë.

Në këtë rregullore janë përcaktuar gjithashtu procedurat e vendimmarrjes, mënyra e interpretimit të dispozitave, si dhe raportet ndërmjet Komisionit Këshillimor dhe Këshillit të Bashkisë, duke e bërë këtë dokument një udhëzues të plotë dhe praktik për funksionimin institucional.

Për të gjitha arsyet e mësipërme, vlerësojmë se miratimi i kësaj rregulloreje është i domosdoshëm, pasi ajo shërben si bazë ligjore dhe etike për veprimtarinë e Komisionit Këshillimor dhe ndihmon njëkohësisht në rritjen e transparencës dhe legjitimitetit të vendimmarrjes së Këshillit të Bashkisë Himarë.

Në këto kushte, kërkojmë miratimin e këtij projektvendimi nga Këshilli i Bashkisë Himarë, duke theksuar gjithashtu gatishmërinë për të reflektuar çdo propozim për ndryshim apo plotësim të tekstit të rregullores nga ju, të nderuar këshilltarë.

DREJTOR I DREJTORISË JURIDIKE

Ardit Muhametaj



REPUBLIKA E SHQIPËRISË
BASHKIA HIMARË
KËSHILLI BASHKIAK

Nr. 8012/prot.
3

Himarë, më 27.10. 2025

RREGULLORE E KOMISIONIT KËSHILLIMOR TË BASHKISË HIMARË

“Për Titujt Vendorë të Nderit, kriteret dhe procedurën e dhënies së tyre si dhe emërtimin e rrugëve, shesheve, territoreve, institucioneve dhe objekteve në juridiksionin e Bashkisë Himarë”

Neni 1
Baza ligjore

Kjo rregullore hartohet në bazë të:

- Kushtetutës së Republikës së Shqipërisë, neni 113/1.
- Ligjit nr. 139/2015, datë 17.12.2015 “Për vetëqeverisjen vendore”, neni 54, pika k, l, dhe m.
- Ligjit nr. 112/2013, datë 04.04.2013 “Për Dekoratat, Titujt e Nderit, Medaljet dhe Titujt Vendorë të Nderit në Republikën e Shqipërisë”.
- Ligjit nr. 94/2022, datë 22.12.2022 “Për titujt e nderit dhe titujt vendorë të nderit në Republikën e Shqipërisë”.
- VKM-së nr. 861, datë 10.02.2014 “Për miratimin e rregullave të hollësishme për funksionimin e komisioneve këshillimore për dhënien e Medaljeve dhe Titujve Vendorë të Nderit në Republikën e Shqipërisë”

Neni 2
Objekti

Kjo rregullore përcakton mënyrën e funksionimit të Komisionit Këshillimor për Titujt Vendorë të Nderit, si dhe procedurën dhe kriteret për dhënien e titujve vendorë të nderit dhe emërtimin e rrugëve, shesheve, territoreve, institucioneve dhe objekteve në juridiksionin e Bashkisë Himarë.

Neni 3
Qëllimi

Qëllimi i kësaj rregulloreje është:

- Përcaktimi i llojeve të titujve të nderit që jepen nga Bashkia Himarë;
- Përcaktimi i mënyrës së emërimit të rrugëve, shesheve, territoreve, institucioneve dhe objekteve publike në juridiksionin e saj.

Neni 4

Parime të përgjithshme

1. Titujt e nderit jepen për persona fizikë ose juridikë, vendas ose të huaj, që kanë kontribut të shquar në dobi të bashkësisë qytetare në fusha të ndryshme.
2. Dhënia e titujve udhëhiqet nga parimet e meritokracisë, transparencës dhe mirënjohjes publike.
3. Dhënia e titullit nuk është e drejtë e fituar dhe nuk mund të kërkohej si e tillë, në rrugë individuale.
4. Personat me dekorata nga Presidenti nuk mund të përfitojnë më vonë në kohë një titull nderi, medalje apo titull vendor nderi.
5. Nuk jepen tituj për persona me të kaluar në bashkëpunim me ish-Sigurimin e shtetit apo agjentina të huaja.
6. Nuk jepen tituj për persona me të kaluar në bashkëpunim apo pjestarë të komisioneve të internimit dhe dëbimeve, gjatë sistemit totalitar.
7. Nuk jepen tituj për persona të dënuar sipas nenit 268 të “Kodit Penal të Republikës së Shqipërisë”.
8. Emërtimet e rrugëve, shesheve, territoreve, institucioneve dhe objekteve në juridiksion të Bashkisë Himarë, mund emërtohen me emra të personaliteteve të shquara në nivel kombëtar e lokal ose të huaj me kontribut të veçantë në promovimin e interesave të qytetit Himarë ose të Kombit Shqiptar si dhe ngjarje historike me rëndësi për territorin e Bashkisë Himarë.
9. Kjo rregullore aplikohet për titujt e nderit, dhënia e të cilëve nuk rregullohet me një akt tjetër ligjor.

Neni 5

Krijimi i Komisionit Këshillimor

1. Krijohet pranë Këshillit të Bashkisë Himarë, me 5 anëtarë: 3 anëtar nga pjestarët e këshillit dhe 2 personalitete jashtë saj.
2. Përbërja miratohet me vendim të Këshillit të Bashkisë.
3. Funksionimi përcaktohet nga kjo rregullore.

Neni 6

Vendimmarrja e Komisionit Këshillimor

1. Mbledhja e Komisionit Këshillimor për Titujt Vendorë të Nderit është e vlefshme kur në mbledhje janë të pranishëm më shumë se gjysma e anëtarëve të Komisionit (50%+1).
2. Vendimet e Komisionit Këshillimor janë të vlefshme kur shumica e numrit të përgjithshëm të anëtarëve të Komisionit votojnë pro (50% + 1).
3. Një çështje për të cilën Komisioni Këshillimor voton kundër në një mbledhje të zakonshme, nuk mund të shqyrtohet nga ky Komision brenda një periudhe prej 6 muajsh.

Neni 7 Llojet e titujve dhe medaljeve

1. Nga Këshilli Bashkiak:

a. "Qytetar Nderi i Himarës"

- Çdo personaliteti shqiptar ose të huaj për veprimtari të shquar në dobi të Bashkisë ose për veprimtari për mbrojtjen dhe promovimin e vlerave të saj.
- Personaliteteve të shquara që kanë dhënë kontribut të spikatur dhe që kanë lënë gjurmë në Bashkinë e Himarës.
- Qytetarë të Himarës që kanë dhënë kontribut të shquar në Shqipëri dhe jashtë saj.

Akordimi i këtij titulli bëhet në përputhje me parashikimet ligjore të përcaktuara në ligjin nr.94/2022 datë 22.12.2022 "Për titujt e nderit dhe titujt vendorë të nderit në Republikën e Shqipërisë", dhe aktet nënligjore në zbatim të këtij ligji.

b. Titull i veçantë vendor i nderit.

- Këshilli i Bashkisë ka të drejtë të krijojë dhe të japë jo më shumë se 3 (tre) tituj të vecantë vendorë nderi në një vit kalendarik, për të shprehur mirënjohjen e posaçme për veprimtarinë e shquar në dobi të komunitetit të saj.

1.1. Titujt e veçantë vendorë të nderit krijohen me vendim të njësisë së vetëqeverisjes vendore, i cili përmban:

- a) Nevojën për nderimin e veçantë;
- b) Arsyeën përse nderimi me titullin "Qytetar Nderi", sipas pikës 9 të ligjit nr.94/2022, nuk është i përshtatshëm dhe i mjaftueshëm dhe shtetasi i propozuar për nderim duhet dalluar nga shtetasi tjetër;
- c) Emërtesën e titullit të veçantë vendor të nderit, i cili përkon me një datë ose ngjarje të shënuar në territorin e njësisë së vetëqeverisjes vendore.

2. Nga Kryetari i Bashkisë:

1. "Personalitet i Qytetit Himarë";

Kryetari i Bashkisë jep medalje për personalitete të shquara:

- a) Personalitet i shquar në fushën e Arsimit.
- b) Personalitet i shquar në fushën e Shëndetësisë.
- c) Personalitet i shquar në fushën e Letërsisë dhe Arteve.

2. "Mirënjohje e Qytetit Himarë"

Kjo medalje u akordohet personave fizik apo juridik, vendas ose të huaj që kanë kontribut të shquar, në fushat e ndryshme të jetës: kulturore, historike, sportive, humanitare etj të cilat nuk parashikohen në pikën 1/a të këtij neni.

Neni 8 E drejta për propozim

1. Propozimi për dhënien e Titujve të Nderit mund të bëhet nga :
 - a) Kryetari i Bashkisë.
 - b) Prefekti i Qarkut.
 - c) Cdo anëtarë i Këshillit Bashkiak.
2. Propozimi për dhënien e medaljeve mund të bëhet nga:
 - a) Drejtues të institucioneve rajonale.
 - b) Organizata jofitimprurese vendase ose të huaja.
 - c) Drejtues të Institucioneve arsimore dhe kulturore.

Neni 9 Procedura e propozimit për titujt

1. Propozimi duhet të dërgohet jo më vonë se 90 ditë kalendarike përpara datës së propozuar për dhënien e titullit në sekretarinë e Këshillit Bashkiak, me përjashtim të rasteve të veçanta kur respektimi i këtij afati është bërë objektivist i pamundur.
2. Në aktin e propozimit përcaktohen:
 - a) autoriteti propozues dhe baza ligjore për propozimin.
 - b) Emri, Mbiemri dhe një prezantim të personit të propozuar (duhet të disponojë foto);
 - c) arsyet e hollësishme që çojnë në propozimin e personit;
 - d) vërtetimi se personi i propozuar nuk është dënuar ndonjëherë për shkelje të rënda të ligjit ose nuk është nën hetim;
 - e) llojin e titullit vendor të nderit ose medaljes që propozohet.
 - f) letër rekomandimi nga një institucion i të njëjtës linjë me të cilin është i lidhur aktiviteti profesional apo njerëzor i personit të propozuar;
 - g) materiale dokumentuese që dëshmojnë për arritjet e personalitetit gjatë jetës së tij, si botime, certifikata, diploma, fletë falenderimi ose mirënjohje etj, të cilat ndihmojnë këshilltarët të kenë një informacion më të plotë të propozimit për dhënien e titullit;
 - h) deklaratë për personin e propozuar që nuk i është akorduar më parë një titull tjetër i nivelit më të lartë se ai vendor;
 - i) çdo propozim për dhënie titulli duhet të shoqërohet me motivacionin përkatës në mënyrë të përmbledhur, motivacioni i cili rishqyrtohet nga komisioni përkatës.
3. Në rastin kur nisma ndërmerret kryesisht nga Këshilli i Bashkisë, është i mjaftueshëm dokumentacioni nga gërma "b" deri në gërmën "i" të pikës 2 të këtij neni.

Neni 10

Shqyrtimi i propozimit

1. Sekretaria e Këshillit të Bashkisë propozimin për titullin vendor të nderit sipas pikës 1 të nenit 8, brenda 5 ditëve kalendarike janë përcjell për shqyrtim Komisionit Këshillimor për Titujt Vendor të Nderit.

2. Komisioni Këshillimor verifikon nëse akti i propozimit përmban të gjitha elementët e procedurës dhe dokumentet shoqëruese.

3. Në rastin kur Komisioni vëren mangësi në dokumentacion ose kërkon informacion shtesë, propozuesit i kërkohet plotësimi i dokumentacionit brenda 15 ditëve kalendarike nga data e marrjes së propozimit, plotësimi i tij nga autoriti propozues. Plotësimi i propozimit bëhet jo më vonë se 15 ditë kalendarike nga data e marrjes së njoftimit.

4. Nëse propozimi është i plotë, Komisioni paraqet mendimin e tij me shkrim para Këshillit Bashkiak brenda 30 ditëve nga data e marrjes së propozimit.

5. Procedurat për shqyrtimin e dhënies së një titulli nderi nuk mund të zgjasin më shumë se 60 ditë kalendarike.

5. Procesi i shqyrtimit të propozimit mund të shtyhet apo të pezullohet përkohësisht për rrethana të paparashikuara, që dëmtojnë reputacionin dhe vlerën e aktit të dhënies së titullit vendor të nderit në opinionin publik, deri në sqarimin e këtyre rrethanave.

Neni 11

Miratimi i propozimit

1. Propozimi miratohet me vendim të Këshillit Bashkiak i cili është autoriteti përgjegjës për miratimin ose jo të propozimit për dhënien e titullit të nderit.

2. Votimi për dhënien e titujve të nderit bëhet sipas përcaktimeve të ligjit nr.139/2015 “Për vetëqeverisjen vendore”.

3. Me vendim të Kryetarit të Bashkisë për medaljet dhe çertifikatat e parashikuara në këtë rregullore.

Neni 12

Refuzimi i propozimit

Propozimi refuzohet kur:

1. Kur propozimi për dhënien e titullit vendor të nderit ose medaljes nuk miratohet, Komisioni Këshillimor për dhëniën e titujve vendor të nderit në Bashkinë Vlorë bën njoftimin autoritetit propozues për mosmiratim.

2. I njëjti propozim nuk mund të bëhet pa kaluar 1 vit kalendarik nga njoftimi i refuzimit të propozimit.

Neni 13

Çertifikata

1. Çertifikata për akordim titujve është e formatit A4 dhe shoqërohet me simbolet e qytetit.

2. Çertifikatat për titujt e aprovuar nga Këshilli Bashkiak nënshkruhen nga Kryetari i

Këshillit Bashkiak dhe vuloet me vulën e Bashkisë Himarë.

3. Çertifikatat për titujt e aprovuar nga Kryetari i Bashkisë nënshkruhen nga Kryetari i Këshillit Bashkiak dhe vuloet me vulën e Bashkisë Himarë.
4. Në çdo rast çertifikata shoqërohet me një medalje sipas specifikime të përcaktuara me Vendim të Këshillit të Ministrave.

Neni 14

Ceremonia

1. Ceremonia e dhënies së titullit organizohet nga institucioni propozues në bashkëpunim me sekretarinë e Këshillit Bashkiak brënda 30 ditëve kalendarike nga miratimi i tij.
2. Dhënia e titullit bëhet me ceremoni publike / jopublike.
3. Titujt e nderit e jep kryetari i Këshillit Bashkiak ose persona të autorizuar nga ai si dhe nga Kryetari i Bashkisë (për titujt e propozuar prej tij).
4. Titulli i nderit i jepet personit të cilit i akordohet. Në rast dhënie titulli pas vdekjes, titulli i jepet familjarëve të personit.
5. Si rregull, dhënia e titulli duhet të jetë e lidhur me përvjetorë të ngjarjeve të rëndësishme historike, kulturore si dhe me festat kombëtare.
6. Çasti i dorëzimit të titujve të nderit mund të shtyhet apo të pezullohet përkohësisht, nëpërmjet të njëjtit akt me të cilin është dhënë fillimisht për rrethana të paparashikuara, që dëmtojnë reputacionin dhe vlerën e aktit të dhënies së titullit vendor të nderit në opinionin publik, deri në sqarimin e këtyre rrethanave.

Neni 15

Evidentimi i titujve

1. Titujt vendor të nderit që jepen nga Këshilli Bashkiak evidentohen në një regjistër të veçantë, i cili administrohet nga sekretaria e Këshillit Bashkiak.
2. Titujt e nderit ose medaljet që jepen me vendim të Kryetarit të Bashkisë evidentohen në regjistër të veçantë nga Sektori i Sekretarisë dhe Arkivit, të Bashkisë Himarë.

Neni 16

Emërtimi i rrugëve, shesheve, territoreve, institucioneve

1. Këshilli i Bashkisë është organ vendimmarrës për emërtimin e Rrugëve, Shesheve, Territoreve, Institucioneve dhe Objekteve në juridiksionin e Bashkisë Vlorë dhe udhëhiqet nga parimi i vlerësimit të kontributit, meritokracisë dhe mirënjohjes publike në vendimmarrjen e tij.
2. Gjatë procedurës së emërtimit vlerësohen personalitete të shquara me kontribut të spikatur në nivel lokal dhe kombëtar si dhe ngjarje me rëndësi në historinë e qytetit të Himarës si dhe në nivel kombëtar. Mund të emërtohen edhe me emra të personaliteteve të huaja të cilat kanë kontribut në promovimin e interesave të Kombit Shqiptar ose qytetit të Vlorës.

Neni 17

E drejta e propozimit për emërtimi i Rrugëve, Shesheve, Territoreve, Institucioneve dhe Objekteve në juridiksionin e Bashkisë Himarë

1. Propozimi për emërtimi i Rrugëve, Shesheve, Territoreve, Institucioneve dhe Objekteve në juridiksionin e Bashkisë Himarë mund të bëhet nga:

- a) Kryetari i Bashkisë.
- b) Prefekti i Qarkut.
- c) Cdo anëtarë i Këshillit Bashkiak.
- d) Organizata jofitimprurëse në nivel kombëtar.

Neni 18

Procedura e shqyrtimit të propozimit për emërtimi i Rrugëve, Shesheve, Territoreve, Institucioneve dhe Objekteve në juridiksionin e Bashkisë Himarë

1. Procedura e propozimit dhe shqyrtimit të tij për emërtimin e rrugëve, shesheve, territoreve, institucioneve dhe objekteve në juridiksionin e Bashkisë Vlorë realizohet sipas parashikimeve të nenit 8 dhe 9 të kësaj rregulloreje për sa nuk bie në kundërshtim me objektin e vendimmarjes së Këshillit të Bashkisë.

2. Propozimi për vendimmarje në Këshillin e Bashkisë shoqërohet me një relacion dhe dokumentacion shoqërues nga Drejtoria e Urbanistikës ku përcaktohet vendodhja e objektit që emërtohet.

3. Vendimi i Këshillit të Bashkisë miratohet bazuar në dispozitat e ligjit nr. 139/2015 “Për Vetëqeverisjen Vendore”.

Neni 19

Interpretimi i rregullores

1. Kur ngrihen pretendime lidhur me interpretimin ose zbatimin e kësaj rregulloreje, ose për çështje të paparashikuar në të, Komisioni Këshillimor, Kryetari i Këshillit dhe Këshilli i Bashkisë përdorin si referencë aktet ligjore dhe nënligjore në fuqi.

2. Në raste të tjera, kërkesa mund të paraqitet për interpretim nga Drejtoria Juridike, si dhe Komisioni i Mandateve dhe Rregullores të Këshillit të Bashkisë.

Neni 20

Hyrja në fuqi

Kjo rregullore hyn në fuqi pas miratimit nga Këshilli i Bashkisë Himarë, sipas nenit 55 të Ligjit nr. 139/2015 “Për vetëqeverisjen vendore”.

KRYETARI

Vangjel Tavo

**NË MUNGESË DHE ME URDHËR
ZËVENDESKRYETARI**

Erifi Berberi

